



PERUTUSAN DATUK BANDAR
MESYUARAT MAJLIS BIL. 6/2018 (PENGAL 2018/2020)
21 DISEMBER 2018 (13 RABIUL AKHIR 1440H)

BISMILLAHIRRAHMANIRRAHIM

Assalamualaikum WBT dan Salam Sejahtera.

1. Kira-kira seminggu sahaja lagi, kita akan melangkah ke tahun baru 2019. Pelbagai suka duka, pahit maung kita harungi bersama-sama. Saya berharap kerjasama yang jitu yang sedia terjalin di antara kita ini sentiasa berkekalan dan berterusan dalam menaikkan lagi imej Petaling Jaya sebagai bandar raya contoh di Malaysia.

Saya ingin mengucapkan ribuan terima kasih kepada Ahli-ahli Majlis, Ketua-ketua Jabatan, pegawai-pegawai dan seterusnya warga kerja Majlis Bandaraya Petaling Jaya yang telah bersama-sama dalam memberikan kerjasama dan komitmen yang sepenuhnya kepada Majlis bagi memastikan pelbagai program dan aktiviti yang telah dirancang dapat dilaksanakan dengan sebaiknya.

Mewakili pengurusan tertinggi Majlis Bandaraya Petaling Jaya, saya akan sentiasa menitikberatkan perkhidmatan yang berkualiti dan berintegriti diberikan kepada warga Petaling Jaya. Bersesuaian dengan aspirasi dan kehendak penduduk Petaling Jaya, komitmen yang jitu serta semangat kerja berpasukan di antara satu sama lain adalah elemen terpenting yang perlu dikehadapankan.

2. ANUGERAH PIHAK BERKUASA TEMPATAN (PBT) PRIHATIN 2018

Majlis Bandaraya Petaling Jaya telah merangkul **Anugerah Pihak Berkuasa Tempatan (PBT) Prihatin 2018** Peringkat Majlis Bandaraya yang telah dianjurkan oleh Kementerian Perumahan dan Kerajaan Tempatan sempena sambutan Hari Orang Kurang Upaya Kebangsaan 2018 yang disambut di seluruh dunia pada 3 Disember setiap tahun. Majlis tersebut telah disempurnakan oleh YAB Dato' Seri Dr Wan Azizah binti Wan Ismail, Timbalan Perdana Menteri Malaysia pada 5 November 2018 yang lalu di Pusat Konvensyen Antarabangsa Putrajaya (PICC).

Anugerah Pihak Berkuasa Tempatan (PBT) Prihatin 2018 pada tahun 2018 ini merupakan kali ketiga bagi Majlis setelah dianugerahkan pada Tahun 2014 dan Tahun 2017. Kriteria utama yang merupakan kelebihan MBPJ ialah dalam menyediakan kemudahan awam dan persekitaran yang mesra OKU berdasarkan konsep rekabentuk sejagat termasuklah di taman awam, bangunan seliaan Majlis, infrastruktur iaitu di laluan pejalan kaki dan perhentian bas, perkhidmatan bas percuma mesra OKU dan van transit OKU di seluruh Petaling Jaya.

Majlis juga telah memenuhi dan mengaplikasikan peruntukan-peruntukan akta dan undang-undang melibatkan golongan sasar ini. Antaranya Majlis telah menubuhkan **Jawatankuasa Teknikal Rekabentuk Sejagat dan Aksesibiliti** di Petaling Jaya, menyediakan **Pelan Tindakan Rekabentuk Sejagat**, menubuhkan **Universal Design Team**, menambahbaik SOP bagi pematuhan aspek rekabentuk sejagat bagi setiap pembangunan di Petaling Jaya, menjalankan **Audit Akses** bagi pemajuan baru sebelum CCC dan bangunan sedia ada secara berkala, menyediakan **Pelan Induk Rekabentuk Sejagat 2017 – 2030**, mengiktiraf bangunan bercirikan UD melalui **Universal Design**

Award dan yang terkini adalah **Universal Design Dashboard** di bawah projek Smart City.

Setiap perancangan dan pembangunan di Petaling Jaya mengambil kira keperluan OKU di mana Majlis telah menyemak sebanyak lebih 500 pemajuan sejak tahun 2008. Setiap pemajuan yang telah siap dibina perlu mendapatkan pengesahan pematuhan Universal Design sewaktu proses CCC bagi memastikan kemudahan ini dilaksanakan mengikut garis panduan dan spesifikasi yang betul berdasarkan Garis Panduan Rekabentuk Sejahtera Petaling Jaya dan pelan sokongan UD.

Selain itu, kelebihan Majlis yang telah dinilai adalah meliputi program-program yang dianjurkan dan turut mengambilkira penyertaan golongan OKU, kanak-kanak dan warga emas. Program berbentuk sukan seperti PJ half marathon, Karnival Sukan Para Bandaraya, *Blind Leading The Blind* dan *Car Free Day*, program kebudayaan seperti sambutan perayaan serta program berbentuk ilmiah iaitu bengkel Audit Akses, International Conference on Universal Design in the Built Environment (ICUDBE) 2017, Universal Design Award dan pelbagai program lain yang tidak meminggirkan keterlibatan bersama golongan OKU.

3. PROGRAM BANGUNAN CERIA : ANUGERAH BANGUNAN HIJAU

Sebanyak enam buah bangunan komersial dan enam buah bangunan kediaman bertingkat di Petaling Jaya telah menerima Anugerah Bangunan Hijau di bawah **Program Bangunan Ceria**.

Anugerah Bangunan Hijau yang melibatkan enam kriteria utama dalam sistem penarafan Indeks Bangunan Hijau (GBI) itu terdiri daripada kecekapan tenaga, kualiti dalaman alam sekitar, perancangan tapak lestari dan pengurusan, bahan & sumber, kecekapan air dan inovasi.

Pemenang bagi setiap kategori menerima hadiah sumbangan bernilai RM 2,000.00 beserta sijil. Berikut adalah senarai pemenang Anugerah Bangunan Hijau:-

Bil	Kriteria Indeks Bangunan Hijau	Jenis Bangunan komersial	Jenis Bangunan Kediaman Bertingkat
1	Kecekapan tenaga (EE)	Centerstages Services Suite (Block B)	Tropicana Garden - Bayberry
2	Kualiti Dalam Alam Sekitar (IEQ)	Menara OBYU (Point 92)	Ara Green
3	Perancangan Tapak Lestari & Pengurusan (SM)	Menara OBYU (Point 92)	Arnica Services Apartment
4	Bahan & Sumber (MR)	Atria (Office Block)	TNB Quarter
5	Kecekapan Air (WE)	Avenue De Vogue	Verde @ Ara Damansara
6	Inovasi (IN)	Dialog Tower	Tropicana Garden - Bayberry

Pemberian anugerah itu diharap dapat memberi galakan kepada pemain industri di kalangan pemaju, arkitek, jurutera, perancang, pereka dan kontraktor untuk merekabentuk bangunan bercirikan konsep bangunan hijau dan seterusnya melestarikan persekitaran alam sekitar di Petaling Jaya.

Dalam pada itu, MBPJ turut komited menggalakkan penggunaan **Sistem Pengumpulan Dan Penggunaan Semula Air Hujan (SPA)** sebagai usaha untuk melestarikan alam. Pada 13 November 2018 yang lalu, Majlis telah menandatangani Memorandum Persefahaman (MOU) bersama dengan tujuh buah sekolah untuk pelaksanaannya pada tahun 2019.

Untuk memantapkan lagi usaha, Majlis akan terus memberikan komitmen untuk menjadikan bangunan-bangunan di Petaling Jaya sebagai bangunan mampan. Manakala bagi struktur bangunan lama, ianya akan diceriakan dengan lukisan mural yang memberikan imej baru yang lebih menarik dan selesa untuk dilihat dan dilawati.

Justeru itu, MBPJ telah bekerjasama dengan Kerajaan Negeri Selangor untuk menaiktaraf bangunan kediaman bertingkat di bawah program Indah Smart Selangor (ISS). Dengan peruntukan sebanyak RM 740,753.71 yang diberikan Kerajaan Negeri, Majlis telah menaiktaraf bangunan Pangsapuri Damai dengan mengecat semula bangunan tersebut untuk menjadikan imej bangunan yang lebih baik dan selesa kepada komuniti setempat. Ia juga selari ke arah menjadikan bandar raya Petaling Jaya sebuah bandar raya yang lebih berdayahuni dan kondusif menjelang 2030.

4. PROGRAM JOM SHOPPING PERALATAN KE SEKOLAH

Majlis Bandaraya Petaling Jaya komited dalam membantu golongan yang kurang berkemampuan dan bernasib baik yang tinggal di Petaling Jaya. Keperihatinan Majlis ini diterjemahkan melalui program Pembasmian Kemiskinan Bandar (PPKB) 'Jom Shopping Peralatan Sekolah' yang telah diadakan di Hypermarket Mydin USJ Subang Jaya, pada 4 Disember 2018 yang lalu.

Seramai 50 orang penerima bantuan PPKB telah menerima baucer bernilai RM 300.00 untuk membeli peralatan sekolah seperti *uniform* sekolah, kasut, alat tulis serta lain-lain keperluan. Pemberian sumbangan ini juga bertujuan meringankan bebanan penduduk yang tidak berkemampuan dengan pendapatan RM2,000 ke bawah serta mempunyai tanggungan anak bersekolah yang ramai. Di samping itu,

program ini merupakan salah satu tanggungjawab dan sumbangan khidmat sosial daripada Majlis kepada komuniti setempat di bawah pentadbirannya.

Kesemua penerima sumbangan ini merupakan penduduk yang berdaftar di bawah **Program Pembasmian Kemiskinan Bandar (PPKB)** yang berada di kawasan pentadbiran MBPJ iaitu PPR Kota Damansara, PPR Lembah Subang, Petaling Jaya Selatan (PJS), Desa Mentari dan lain-lain kawasan.

Majlis turut melancarkan **Sistem E-Commerce Karung Kitar** (<https://www.ppkbmbpj.com/ecommerce>) yang diwujudkan bagi mengembang dan mempertingkatkan jualan produk PPKB serta membolehkan peserta PPKB menjana pendapatan tambahan.

5. KESIHATAN DAN KEBERSIHAN DI PETALING JAYA

5.1 KES DENGGI DI PETALING JAYA

Jumlah kes demam denggi bagi tahun 2018 sehingga minggu epid 49 adalah sejumlah **3352 kes** telah direkodkan. Jumlah ini menunjukkan **penurunan** kes sebanyak **1 peratus** berbanding tempoh yang sama tahun 2017 dengan **3367 kes**. Tiada kes kematian dilaporkan setakat ini. Jumlah ini juga adalah yang terendah berbanding 2 PBT lain di daerah Petaling.

Berikut adalah lokaliti wabak terkini yang dilaporkan. Bilangan Kawasan Hotspot Terkini Dilaporkan sehingga 12/12/2018 :

Bil	Senarai Nama Lokaliti Wabak	Jumlah Kes Terkini	Wabak Di JangkaTamat
1	BG SEKSYEN 51A FLAT IMPIAN BAIDURI	15	19/12/2018
2	BL PJU 6 FLAT PELANGI DAMANSARA (D, E, F)	14	21/12/2018
3	DU PJU 1 (4)	9	14/12/2018
4	SRI PJS 10 APT SRI SUBANG	8	18/12/2018
5	SRI PJS 8 MENTARI COURT	11	20/12/2018
6	SRI SS 7 PARKLAND BUSINESS AVANUE	7	13/12/2018
7	TM PJS 2D FLAT DESA MENTARI (BLOK 11)	28	19/12/2018
JUMLAH		92	

5.2 PROGRAM SEDAR

Pasukan SEDAR, masih aktif dilaksanakan. Sehingga kini, sebanyak **243 pasukan SEDAR** telah ditubuhkan dan di perluaskan kepada lokasi-lokasi seperti berikut:

- 1) 157 Pasukan SEDAR Komuniti
- 2) 67 Pasukan SEDAR Sekolah
- 3) 5 Pasukan SEDAR Tapak Binaan
- 4) 7 Pasukan SEDAR MBPJ
- 5) 2 Pasukan SEDAR Kilang (Western Digital dan Dutch Lady)
- 6) 1 Pasukan SEDAR Hospital (KPJ Damansara Specialist Hospital)
- 7) 4 Pasukan SEDAR Masjid (Masjid Kampung Baiduri)

6. PROGRAM PASUKAN KESELAMATAN KEJIRANAN PETALING JAYA (PKKPJ)

Program Pasukan Keselamatan Kejiranan Petaling Jaya (PKKPJ) yang berkonsepkan penglibatan awam / komuniti "*public engagement*" adalah merupakan inisiatif Majlis ke arah menangani isu-isu keselamatan setempat serta melestarikan kehidupan penduduk di Petaling Jaya. Program PKKPJ telah memberikan impak pelaksanaan yang baik seiring dengan **Pelan Induk Keselamatan PJ** yang mempunyai 4 fokus utama iaitu **keselamatan persekitaran, keselamatan infrastruktur, keselamatan digital dan pengurusan penguatkuasaan / keselamatan.**

Penggunaan portal PKKPJ yang telah dibangunkan pada awal tahun 2018 dilihat memberi kemudahan akses kepada komuniti seperti membuat permohonan, pelaporan dan semakan. Ianya juga selari dengan matlamat bagi menjadikan Majlis Bandaraya Petaling Jaya sebuah bandar raya pintar, mampan dan berdaya huni.

Pada tahun 2018, sebanyak 143 permohonan telah diterima berbanding 140 bagi tahun 2017. Permohonan 2018 terbahagi kepada Persatuan Penduduk (RA) sebanyak 91, Rukun Tetangga (RT) sebanyak 35 dan Badan Pengurusan Bersama (JMB) sebanyak 17.

Justeru itu, menyedari kejayaan pelaksanaan program ini, Majlis telah mengekalkan jumlah peruntukan sejumlah RM 1.3 juta bagi tahun 2019 kepada RA, RT dan JMB yang layak serta memenuhi kriteria yang ditetapkan. Oleh yang demikian, Majlis mempelawa semua RA, RT dan JMB yang layak untuk membuat permohonan semula bagi tahun 2019 secara atas talian melalui portal PKKPJ di pautan <http://pkkpj.mbpj.gov.my> mulai 1 Disember 2018 sehingga 28 Februari 2019.

Sekian, terima kasih.

